

Vlada Japana će uvećati pomoć ekonomiji Bosne i Hercegovine

O odnosima dvije zemlje, organizaciji Olimpijskih igara u Tokiju, ulaganjima Japana u BiH, te turizmu, za Oslobođenje govori ambasador Makoto Ito

Razgovarala: **AMINA ZORNIĆ**

Ambasador Makoto Ito na poziciju ambasadora Japana u našoj zemlji došao je u decembru 2020. godine. Prethodno iskustvo u diplomaciji stekao je u Istočnoj i Južnoj Evropi, Sjevernoj i Latinskoj Americi. Prije dolaska u BiH bio je ambasador Japana u Tirani.

Prethodne godine proveli ste na Balkanu, tačnije, u Albaniji, ali ste prvi put u Bosni i Hercegovini. Kakve su Vaše prve impresije?

- Iako sam tokom svoje diplomatske karijere posjetio i živio u mnogim zemljama Istočne Evrope i Balkana, u Bosni i Hercegovini sam prvi put. Moj prvi utisak je izvanredno snažan.

Važna godišnjica

Impresioniran sam lijepim gradovima, u kojima je vidljiva dugogodišnja tradicija, ali su vidljivi i znakovi konflikta. Također, impresionirali su me ljubaznost i osmijesi građana koje sam susreo.

U 2021. obilježavamo bitan jubilej - 25 godina od uspostavljanja diplomatskih veza između Japana i Bosne i Hercegovine. Koliko će, u vremenu pandemije, biti prostora da se upriliči svečanost s ciljem jačanja bilateralnih odnosa dviju zemalja?

- Upravo tako, ova godina je bitna, jer u februaru obilježavamo 25. godišnjicu uspostave diplomatskih odnosa između naše dvije zemlje. Želio bih organizirati neki događaj ili ceremoniju kako bismo obilježili ovu godišnjicu i dalje jačali naše bliske odnose. Ipak, zbog situacije s pandemijom, teško mi je reći ili predvidjeti kad će biti moguće organizirati ove događaje u obje države. S obzirom na to da nismo u mogućnosti organizirati veća okupljanja, kad to bude moguće, zaista bih želio pozvati vaše čitatelje da učestvuju u ovim događanjima.

Poznata je stalna podrška Japana u obnovi škola u BiH, domova



Makoto Ito: Građani BiH su ljubazni / SENAD GUBELIĆ

zdravlja, u procesu deminiranja te stalnim donacijama našoj zemlji. Koliko će i u vremenu koje slijedi biti sličnih projekata?

- Kao što ste pomenuli, kao vrste pomoći japanska vlada je pružala pomoć u različitim sektorima, s ciljem stabilnog razvoja, odnosno podrške socijalnoj i ekonomskoj stabilnosti vaše zemlje. Možemo spomenuti Kreditnu pomoć (Projekt zajma japanskog Yena), tehničku saradnju preko Japanske agencije za međunarodnu saradnju (JICA), uključujući podizanje kapaciteta, kao i brojne grant-projekte, posebno Temeljnu grant-pomoć za projekte iz oblasti ljudske sigurnosti i kulture koje

je naša ambasada realizirala. To su projekti pomoći japanske vlade namijenjeni Bosni i Hercegovini, entitetima i nevladinom sektoru, koji će se dalje nastaviti razvijati i biti prošireni. Naša vlada je veoma privržena podršci u brojnim sektorima, kao što su zaštita okoliša, zdravstveni sektor, obrazovanje...

Japan se vraća u normalu nakon vanrednog stanja i pandemije koja je naštetila ekonomiji. Kakvo je stanje početkom 2021. godine, kako traje proces organizacije Olimpijskih igara u Tokiju? Postoji li mogućnost nove odgode?

- Slično kao i u drugim zemljama u svijetu, japanska ekonomija je pretrpjela gubitke tokom protekle godine, uzrokovane pandemijom. S obzirom na trend globalizacije ekonomije, Japan ne može sam prevladati nastalu krizu. Još je situacija s pandemijom Covid-19 u Japanu ozbiljna. Teško je u ovom momentu predvidjeti kraj pandemije. Iako je broj zaraženih i umrlih u Japanu još nizak, s obzirom na to da nema pravog li-

I jedni i drugi imamo sposobnost prilagođavanja i tolerancije kako bismo prihvatili strane kulture. Ovaj duh tolerancije će nam, vjerujem, pomoći u stvaranju pozitivne energije i raznolikosti našeg društva

jeka, proces vakcinacije ostaje prioritet u narednom periodu.

Olimpijske igre u Tokiju su već jednom bile odgođene prošlog ljeta, te će ove godine biti održane 23. jula 2021.

Trenutno, japanska vlada, vlada metropolisa Tokio i medicinski stručnjaci su u procesu priprema i pronalazjenja najboljih načina kako organizirati Olimpijske igre da bi one protekle sigurno, mirno i uspješno.

Građani Japana su česti gosti u BiH, na hiljade japanskih turista ugošćavamo svake godine. Kada japanske turiste možemo očekivati ponovo? Ima li prostora za

uzvratne posjete i eventualne olakšice bh. građanima za putovanja u Zemlju izlazećeg sunca?

- Slično kao i u mnogim drugim sektorima, pandemija koronavirusa je utjecala na sektor turizma. U Japanu, sve djelatnosti koje su vezane za turizam, poput aviokompanija, hotelske industrije, putničkih agencija i slično, izuzetno su pogođene trenutnom situacijom.

Povratak turista

Japanski turisti koji posjećuju Evropu imaju interes za historiju, spomenike, muzeje, mjesta uvrštena u UNESCO-ovu listu kulturne baštine, isprobavanje specijaliteta lokalne kuhinje... Japanski turisti obično ostaju relativno kratko, u prosjeku 10-ak dana, tokom kojih osim gradova u Bosni i Hercegovini (Sarajevo, Mostar, Banja Luka...), obično posjećuju i susjedne zemlje (Hrvatsku, Srbiju, Sloveniju). Optimističan sam i posve siguran da će se nakon završetka pandemije japanski turisti vratiti u ove lijepe gradove širom BiH, koji imaju mnogo turističkih potencijala.

Što se tiče posjetilaca iz BiH koji žele posjetiti Japan, to također ovisi o situaciji s Covid-19. Ipak, nakon završetka pandemije, japanska vlada je spremna primiti turiste, a naša ambasada će biti spremna kako bi podržala ove zahtjeve.

Može li se napraviti poveznica među građanima BiH i Japana kao ljudi koji vrednuju kulturu i tradiciju?

- Relativno kratko sam u BiH, a ipak sam već primijetio neke sličnosti između Japanaca i ljudi u Bosni i Hercegovini.

I jedni i drugi negujemo i duboko poštujemo historiju, tradiciju i važnost porodičnih veza. Također, imamo jak osjećaj ponosa prema sopstvenoj kulturi, jeziku, umjetnosti i muzici.

Troje uhapšenih za šverc duhana



Oduzete tone duhana

Pripadnici Državne agencije za istrage i zaštitu (SIPA) su u akciji Skuter dva uhapsili tri osobe u Foči i Bijeljini, saopšteno je iz SIPA. Osumnjičeni su za organizovani kriminal i nedozvoljen promet akciznih proizvoda.

Prilikom pretresa na četiri lokacije oduzeli su 1.259 kutija cigareta, 3.810 kg raznog duhana, četiri vage, pet mobilnih telefona, četiri SIM kartice i novac - 16.000 eura, 630 američkih dolara i 5.500 KM, ali i druge predmete. Akcija je realizovana u saradnji s policijom MUP-a RS-a.

Vlada HNK-a nudi veće plate

Vlada Hercegovačko-neretvanskog kantona jučer je, na prijedlog Ministra zdravstva, rada i socijalne skrbi, ponudila zaključivanje kolektivnog ugovora u oblasti zdravstva.

Prijedlogom se nudi povećanje visine osobnih dohodaka i drugih prava, na tragu postotaka i prava koji su zajamčeni važećim kolektivnim ugovorom s liječnicima i stomatolozima, u jednakim omjerima, saopćeno je iz Vlade HNK-a.

Zdravstveni djelatnici HNK-a su i prošlu noć proveli pred zgradom Vlade u improviziranoj šatoru.



Štrajk zdravstvenih radnika

- Trojica su nas ostala ovdje noći, bilo je zaista hladno. Maloprije smo donijeli lampe za grijanje, pripremamo nove krevete, deke i vreće za spavanje, kazao nam je Ivica Anić, predsjednik nezavisnog Sindikata zdravstvenih djelatnika SKB-a Mostar, neposredno pred donošenje odluke Vlade HNK-a.

Pored premijera Vlade Nevenka Hercega i resornog ministra Gorana Opsenice, za nepotpisivanje kolektivnog ugovora odgovornim smatraju i ministra finansija Adnana Faladžića.

S. T.